

Newspaper	Berita Harian
Date	9/1/2013

Amanat Najib perkasa sektor awam

BH 9/1/2013

Ketika berucap pada Perhimpunan Bulanan Jabatan Perdana Menteri kelmarin, Datuk Seri Najib Razak menggariskan tujuh perkara yang perlu menjadi tumpuan dan fokus utama penjawat awam bagi memastikan Bajet 2013 dilaksanakan dengan cekap dan lancar sejajar agenda transformasi negara memberi kesan dan kepuasan kepada rakyat serta menepati tema bajet iaitu, 'Memakmur Negara, Mensejahtera Rakyat: Sebuah Janji Ditepati.'

Tujuh perkara itu ialah memastikan perpaduan dan jati diri nasional diperkukuhkan, melaksanakan Bajet 2013 dengan lancar mengikut jadual, agenda GTP memberi kesan dan kepuasan kepada rakyat selain suntikan pertumbuhan ekonomi negara, penambahan hasil kekayaan negara diagih secara adil dan saksama kepada rakyat, program di bawah Strategi Lautan Biru Kebangsaan (NBOS) dilaksana sepenuhnya, perkhidmatan cepat, tepat dan berintegriti selain pemikiran kreatif lagi inovatif dan KPI menteri serta kementerian perlu dicapai sepenuhnya.

Serius tepati janji

Ternyata Perdana Menteri begitu serius dalam memastikan semua janji yang diberikan kepada rakyat melalui Bajet 2013 ditunaikan bukan saja dengan segera tetapi yang lebih penting secara efektif dan boleh memberi kesan kepada kesejahteraan rakyat dan kemakmuran negara.

Najib sedar bahawa peranan penjawat awam sangat penting dalam memastikan setiap perancangan tersebut dapat direalisasikan dengan jayanya. Maka tujuh perkara yang disentuh ini wajar dilihat sebagai amanat penting Najib kepada penjawat awam dalam usaha untuk memperkasakan peranan dan sumbangan penjawat awam dan sektor awam di negara kita.

Contohnya dalam memastikan perpaduan dan jati diri nasional diperkukuhkan, penjawat awam perlu buktikan kepada rakyat bahawa kerajaan hari ini adil dan saksama serta tidak meminggirkan atau melakukan diskriminasi terhadap mana-mana kaum.

Gambaran hasrat kerajaan

Perkhidmatan yang adil dan saksama oleh kerajaan ataupun dalam konteks ini oleh penjawat awam untuk rakyat pelbagai agama dan bangsa akan memberikan gambaran yang jelas mengenai hasrat kerajaan yang mahu bersikap adil dan saksama demi memperkukuhkan jati diri dan perpaduan nasional.

Seterusnya penjawat awam juga yang bertindak sebagai nadi dan jentera pentadbiran kerajaan perlu memastikan agar semua

janji yang diketengahkan melalui Bajet 2013 dilaksanakan lancar mengikut jadual.

Rakyat pelbagai peringkat sedang menunggu pelbagai bantuan yang dijanjikan kerajaan seperti Bantuan Rakyat Malaysia (BR1M) serta wang bantuan persekolahan seperti yang diumumkan dalam Bajet 2013.

Kita tidak mahu rakyat terus merungut bahawa pelbagai kerenah birokrasi terus menjadi penghalang untuk mereka peroleh bantuan dengan cepat dan lancar. Penjawat awam yang terbabit perlu memastikan agar bantuan seumpama ini berjalan lancar dan memudahkan rakyat.

Satu lagi perkara menarik ialah mengenai program di bawah Strategi Lautan Biru Kebangsaan (NBOS). Seperti yang kita sedia maklum, pelaksanaan pelbagai program di bawah projek NBOS sebelum ini mendatangkan hasil yang cukup menggalakkan seperti kerjasama erat antara Polis Diraja Malaysia (PDRM) dengan Angkatan Tentera Malaysia (ATM) yang berjaya mengurangkan kadar jenayah di negara kita.

Maka dalam hal ini penjawat awam perlu meneruskan banyak lagi program seumpama ini supaya NBOS dapat dilaksanakan sepenuhnya dalam setiap program kerajaan agar dapat memberi impak positif dan manfaat kepada rakyat dan negara.

Tingkat imej

Begitu juga halnya dengan amalan budaya perkhidmatan cepat, tepat dan berintegriti selain pemikiran kreatif lagi inovatif. Imej perkhidmatan awam perlu terus dipertingkatkan lagi. Kita mahu rakyat terus yakin dan percaya kepada sektor awam kita terutamanya dari segi penyediaan perkhidmatan yang cepat, tepat dan berintegriti.

Dalam membudayakan hal ini, penjawat awam perlu sedar bahawa pemikiran kreatif dan amalan inovasi bukan lagi satu opsyen semata-mata. Ia sudah menjadi kewajipan yang mutlak demi kelestarian budaya prestasi yang tinggi. Semua jabatan kerajaan perlu membuka seluas-luasnya pintu untuk pemikiran kreatif dan inovatif dalam memastikan penyampaian perkhidmatan berlaku dengan lancar dan kekal relevan sepanjang masa.

Ringkasnya, semoga amanat Najib ini akan menjadi pegangan dan panduan kepada seluruh warga penjawat awam dan jabatan kerajaan dalam menentukan hala tuju masing-masing agar sentiasa dapat mematuhi slogan Rakyat Didahulukan, Pencapaian Diutamakan.



Penulis

ialah Ketua Bahagian Perancangan Korporat UPM



**NOOR MOHAMAD
SHAKIL HAMEED**

bhnews@bharian.com.my